

El dernière dè Zante.

El marché d'Bracqnières.

Fine es't'in habituée du marché d'Bracqnières. Du n'sais nî si ç'est pasquè ç'est l'lundi mais elle a toudi ène fourboultrie d'affères à akatér djustemint ç'djoû-la: des légumes pou l'bouillon, ène tirette pou l'djilet d'Zante, des fleurs artificielles pou mett' au cim'tière, bref tout in moncha d'marchandises qui sont dèv'nues indispensâb's su deux djoûs d'temps.

Dè timps en timps, Zante li tînt compagnie.

Bîn seur, ça dèpend du timps qu'l fait: Si l djèle à pierre find' ou bîn si l drache à r'laye dè bidet, Zante a astant d'morér au culot à s'caufér in lisant s'gazette.

Donc, quand ça l'arrindje, invî onze heûres, v'là no Zante dallé. l gare es'n'auto au d'bout dè l'rue du Coron Tomboû, djusse à l'intrée du marché, costé Vieille Place èyè l couminche es'tournée. C'est toudi l'min-me trajet.

l passe prumî pad'vant l'marchand d'poulets rostis: ça li plaît bîn, ç'n'ôdeur-la, l'ôdeur dè l'graisse qui fond, les vapeûrs dè l'marinade qui vo z'ouv'té télmint l'appétit què vos sintèz djà l'viande croustillî pad'sous vos dints!

Dè timps en timps, l passe es coummade pou quand l va r'passér: ène belle grosse manchette d'ène lîv' qui s'ra co toute caude quand l s'ra r'vènu èyè presse à din-nér.

Ene bèquée pu long, l s'arrête au marchand d'toubak. Là ètou, ç'es't'in arrêt foûrt agrèâb' pou s'nez pasquè Thierry (ç'est l'nom du marchand), l vind ètou du café èyè l'moûd d'sus place! Vo sintèz l'Maragogye ou bîn l'Santos mieux què si vo z'in buvî trois jattes au fin fond du Brésil!

Tout dallant, tout v'nant, il examine les légumes qui sont esposés par çï par là. C'n'est nî pou d'akatér, Fine s'in d'occupe. Non, ç'est pou constatér(!) qu'l sont branmint moins bia ou bîn moins gros èyè moins naturels què les cîns qu'il a (ou putôt qu'il avoût) dins s'gardin.



Comme Zante est counneu comme in bleu tchîn, es progresssion n'est nî des pu rapides. Tous les chinq mè't's, l'rincont' ène saqui qu'l counnoit assez pou tapér ène pè'tite dè'vise.

C'qui fait què quand il arrive à whauteur du pont l'vant, el clockî d'St Martin a djà sonnè les douze heures, ç'qu'l fait qu'Il est grand temps pour li dè dallér r'trouvèr ses coumarâdes.

Ayu ça? au café du Pont-Levis bîn seur!

C'es't'in bia p'tit cabaret, in cabaret d'villâdje comme l n'd'a pu wére. In cabaret ayusqu'el patron-Angelo-appelle tout l'monde pa s'pè'tit nom, ayusqu'el patronne-Isabelle- passe avu n'manoque èyè des p'tits croissants ou pains au chocolat. Bref, in cabaret ayusqu'in pusse dè vo consommation, vos r'cèvèz in prime in sourire ou bîn in mot djintil!

Là, Zante ertrouve Raoul èyè Claudy, deux habitués. Est-ce qu'l sont pionsonnés ou bîn chômeurs ou bîn in condjî? Zante nè l'a jamais d'mandé pusqué ç'n'est nî ça qui li fait l'pléji dè l'z'ertouvér.

Après, l ya les marchands, les cîns qui ont rimballé ou bîn qui laich'té à lun feumme el soin d'frumér boutique avant d'v'ni l'z'erquère.

Il a là Sébastin, el bouchî; Marcel, el marchand d'cass'roles, Thierry, el marchand d'toubak què d'vos ai djà cité èyè Johan: ç't'l-la, c'es't'in bouлиндjî qui vînt d'Grammont èyè qui vind des tartèlletes au maton à vo fait blèffér!

Eyè, pindant n'bonne heure, tout ç'pè'tit monde-la (intrètemps, les feummes sont s't'arrivées èyè fait'tè binde inchènes) va racontér ses p'tites joies ou bîns ses p'tits tracas dè l' sèmaine, va parlér du tims qu'l va fait, du footballe, bref, dè tout ç'qui soulâdje no n'existance sins jamais fai d'tort à personne!

D'ai djà dit què du dalloûs d'mandér à Zante dè notér les carabistouilles qu'il intidoût pou pover vo l'zes racontér à l'occâsion.

Pasquè, là ètou, on d'intind des vertes èyè des co pu meurtes!

Françwès